

Utusan Malaysia Februari 2018

Bil.	Tarikh	Tajuk Berita	Catatan	Muka Surat
1.	01 Februari 2018	Apa lagi yang tersembunyi di sebalik projek terowong?	Suruhanjaya Pencegahan Rasuah Malaysia (SPRM),	3
2.	05 Februari 2018	Pengarah JPS Perlis, dua lagi disambung reman kes rasuah	Suruhanjaya Pencegahan Rasuah Malaysia (SPRM)	5
3.	06 Februari 2018	7 termasuk pegawai kanan GLC ditahan Disyaki minta, terima rasuah daripada kontraktor	Suruhanjaya Pencegahan Rasuah Malaysia (SPRM),	6
4.	07 Februari 2018	Bantu SPRM siasat kes rasuah RM40,000	Suruhanjaya Pencegahan Rasuah Malaysia (SPRM),	8
5.	07 Februari 2018	Tujuh direman lima hari Bantu siasatan kes rasuah bagi kerja-kerja penyelenggaraan landskap	Suruhanjaya Pencegahan Rasuah Malaysia (SPRM),	9
6.	08 Februari 2018	Lapan kakitangan QEH buat tuntutan palsu didenda	Suruhanjaya Pencegahan Rasuah Malaysia (SPRM)	11
7.	09 Februari 2018	Dua lagi anggota polis ditahan SPRM	Suruhanjaya Pencegahan Rasuah Malaysia (SPRM)	12
8.	12 Februari 2018	MDEC tidak berkompromi salah laku tadbir urus Ekonomi Digital	Ketua Pegawai Eksekutifnya, Datuk Yasmin Mahmood	14
9.	13 Februari 2018	Pesara tentera dituduh kemukakan invois butiran palsu	Suruhanjaya Pencegahan Rasuah Malaysia (SPRM)	16
10.	14 Februari 2018	Penjawat awam didakwa terima suapan	Suruhanjaya Pencegahan Rasuah Malaysia (SPRM)	17
11.	15 Februari 2018	SPRM ambil keterangan Ramasamy	Suruhanjaya Pencegahan Rasuah Malaysia (SPRM)	19
12.	16 Februari 2018	Siasat isu tanah Ijok	Bekas Menteri Besar Selangor, Tan Sri Abdul Khalid Ibrahim	21
13.	17 Februari 2018	Segera siasat skandal tanah Ijok - Irmohizam	Suruhanjaya Pencegahan Rasuah Malaysia (SPRM)	23
14.	17 Februari 2018	Rampas balak haram dan jentera bernilai RM1.3 juta	Suruhanjaya Pencegahan Rasuah Malaysia (SPRM)	25
15.	21 Februari 2018	Sogok pegawai JPJ: Pemilik bas dipenjara sehari, denda RM11,000	Suruhanjaya Pencegahan Rasuah Malaysia (SPRM)	26
16.	21 Februari 2018	Pembantu pegawai teknik TM didakwa palsu dokumen RM4.7 juta	Suruhanjaya Pencegahan Rasuah Malaysia (SPRM)	27

Bil.	Tarikh	Tajuk Berita	Catatan	Muka Surat
17.	21 Februari 2018	Pengurus anak syarikat kerajaan negeri Terengganu ditahan SPRM	Suruhanjaya Pencegahan Rasuah Malaysia (SPRM)	28
18.	25 Februari 2018	Dakwaan punca CPI merosot tidak munasabah	Suruhanjaya Pencegahan Rasuah Malaysia (SPRM)	29
19.	27 Februari 2018	Isu terowong: SPRM dalam proses melantik konsultan	Suruhanjaya Pencegahan Rasuah Malaysia (SPRM)	31
20.	27 Februari 2018	Suami dapat suapan, isteri kena penjara Dipenjara lima hari, denda RM307,086 kerana dapatkan suapan untuk suami	Suruhanjaya Pencegahan Rasuah Malaysia (SPRM)	32
21.	28 Februari 2018	Datuk Seri terima RM19j ditahan Dakwa mampu tutup kes terowong dasar laut Pulau Pinang	Suruhanjaya Pencegahan Rasuah Malaysia (SPRM)	33
22.	28 Februari 2018	Projek mega terowong Pulau Pinang: Datuk Seri direman enam hari	Suruhanjaya Pencegahan Rasuah Malaysia (SPRM)	35
23.	28 Februari 2018	Bekas pengurus pembangunan perniagaan bank didakwa	Suruhanjaya Pencegahan Rasuah Malaysia (SPRM)	36
24.	28 Februari 2018	Kes terowong P. Pinang: Ahli perniagaan direman 6 hari	Suruhanjaya Pencegahan Rasuah Malaysia (SPRM)	37
25.	28 Februari 2018	SPRM beku akaun RM3.6 juta, sita kenderaan dan rumah RM3.8 juta	Suruhanjaya Pencegahan Rasuah Malaysia (SPRM)	38

1. Apa lagi yang tersembunyi di sebalik projek terowong?

JIKA tidak kerana siasatan Suruhanjaya Pencegahan Rasuah Malaysia (SPRM), banyak yang tidak diketahui mengenai projek mega terowong dasar laut dan tiga lebuh raya yang dirancang Kerajaan DAP Pulau Pinang.

Setakat yang diketahui penduduk, projek itu dirancang untuk mengurangkan kesesakan khususnya di bahagian pulau negeri ini.

Sama ada berbaloi untuk membelanjakan lebih RM6 bilion bagi menyelesaikan masalah kesesakan itu, hanya Kerajaan DAP Pulau Pinang yang mempunyai jawapannya.

Sehingga ke hari ini juga, iaitu selepas lebih lima tahun projek itu diuar-uarkan kerajaan negeri, tiada apa-apa perkembangan pun berhubung kedua-dua projek itu.

Peliknya, tanah milik rakyat bernilai jutaan ringgit yang dipindah milik sebagai kos bayaran kajian kebolehlaksanaan projek itu sudah pun terlepas ke tangan pemaju swasta.

Pelbagai projek komersial bertaraf mewah dan elit juga sudah dirancang pemaju di atas tanah tersebut yang sepatutnya dibangunkan bagi memenuhi keperluan rakyat seperti rumah mampu milik.

Tetapi dalam masa sama, projek utama iaitu terowong dasar laut dan tiga lebuh raya sehingga kini masih lagi samar-samar dan kerajaan negeri terus berselindung di sebalik alasan kajian kebolehlaksanaan dan impak alam sekitar (EIA).

Ini menimbulkan persoalan projek mana sebenarnya yang menjadi keutamaan Kerajaan DAP Pulau Pinang?

Adakah projek terowong dasar laut dan tiga lebuh raya yang kononnya bagi mengurangkan kesesakan lalu-lintas?

Atau projek di atas tanah milik rakyat yang diserahkan kepada pemaju sebagai kos kajian yang kini sedang dirancang dengan pembangunan mewah?

Apa yang dibimbangi penduduk ketika ini adalah projek terowong dasar laut dan tiga lebuh raya itu hanya diwujudkan bagi merasionalkan perjanjian tukar milik tanah rakyat kepada pemaju semata-mata.

Dengan sekian banyak alasan dan kontroversi serta percanggahan penjelasan oleh kerajaan negeri termasuk ketika sidang Dewan Undangan Negeri (DUN), projek terowong dan lebuh raya itu pada akhirnya tidak akan pernah terlaksana.

Jika itu berlaku, penduduk Pulau Pinang menanggung kerugian cukup besar kerana tanah milik mereka sudah pun terlepas kepada pemaju dan mustahil dapat dikembalikan semula kepada mereka.

05 Februari 2018

2. Pengarah JPS Perlis, dua lagi disambung reman kes rasuah



ALOR SETAR 5 Feb. - Tempoh tahanan reman bagi Pengarah Jabatan Pengairan dan Saliran (JPS) Perlis yang disiasat berhubung kes rasuah dan salah guna kuasa disambung enam hari bermula esok.

Penolong Kanan Pendaftar Mahkamah Alor Setar, Nor Azah Idris hari ini membenarkan reman suspek berusia 60 tahun itu disambung bermula esok hingga 11 Februari depan.

Sementara itu, dua orang kontraktor yang ditahan kerana disyaki terlibat dibebaskan dengan jaminan Suruhanjaya Pencegahan Rasuah Malaysia (SPRM) sebanyak RM15,000 seorang dengan seorang penjamin bagi setiap seorang.

Pengarah JPS Perlis dan dua pemilik syarikat berusia 39 dan 50 tahun sebelum ini direman selama tujuh hari mulai 30 Januari lalu hingga hari ini.

Terdahulu, pengarah berusia 60 tahun itu tiba di pekarangan Kompleks Mahkamah Alor Setar kira-kira pukul 9.30 pagi diikuti dua pemilik terbabit pada pukul 9.40 pagi ini

3. 7 termasuk pegawai kanan GLC ditahan

Disyaki minta, terima rasuah daripada kontraktor

KUALA LUMPUR 5 Feb. - Suruhanjaya Pencegahan Rasuah Malaysia (SPRM) hari ini menahan tujuh individu termasuk Timbalan Pengurus Besar dan Pengarah Projek Selatan 1 sebuah syarikat berkaitan kerajaan (GLC) kerana disyaki menyalahgunakan kuasa dengan meminta serta menerima rasuah antara tahun 2013 dan 2017.



Menurut sumber, Timbalan Pengurus Besar berusia 44 tahun dan Pengarah Projek Selatan 1 berusia 55 tahun itu masing-masing ditahan antara pukul 3 petang dan 4 petang di pejabat SPM Johor.

Ujarnya, kedua-duanya ditahan bagi membantu siasatan kerana meminta dan menerima rasuah daripada kontraktor untuk melayakkan mereka menerima bayaran penuh daripada tuntutan bulanan bagi kerja-kerja penyelenggaraan landskap syarikat itu.

Jelasnya, seorang wanita yang merupakan pembantu peribadi kepada Timbalan Pengurus Besar berkenaan yang berusia 34 tahun turut ditahan di lokasi yang sama bagi membantu siasatan kes tersebut.

AZAM BAKI

"Hasil siasatan SPM mendapati, Timbalan Pengurus Besar dan Pengarah Projek Selatan 1 tersebut akan memastikan

kontrak landskap di bawah seliaan mereka dianugerahkan kepada lapan buah syarikat melalui tiga peringkat iaitu E-Bidding, One Off Contract dan Maintainance yang berjumlah kira-kira RM44 juta.

"Difahamkan, Timbalan Pengurus Besar tersebut akan mengarahkan eksekutif syarikat untuk memberi markah sebanyak 80 peratus kepada syarikat kontraktor yang bertanggungjawab atas kerja-kerja penyelenggaraan landskap supaya mereka menerima bayaran penuh daripada tuntutan bulanan yang dikemukakan," katanya di sini hari ini.

Sumber memberitahu, Pengarah Projek Selatan 1 yang mempunyai bidang kuasa untuk melantik kontraktor, pembekal dan juru runding selain meluluskan pembayaran juga akan meluluskan tuntutan yang dikemukakan oleh kontraktor-kontraktor berkenaan supaya mereka menerima bayaran penuh seperti yang dinyatakan dalam kontrak.

Tambahnya, maklumat awal yang diperoleh oleh pasukan penyiasat mendapat bayaran yang mencurigakan melebihi RM2.4 juta dimasukkan ke akaun bank milik Timbalan Pengurus Besar syarikat dan isterinya daripada lapan buah syarikat kontraktor berkenaan melalui empat orang proksi.

"Keempat-empat proksi tersebut turut ditahan antara pukul 10 pagi hingga 12 tengah hari di ibu pejabat SPRM, Shah Alam, Klang dan Melaka. SPRM juga menyita 15 akaun milik Timbalan Pengurus Besar tersebut dan syarikat kontraktor yang mengandungi wang berjumlah RM360,000 bagi membantu siasatan," jelasnya.

Sementara itu, Timbalan Ketua Pesuruhjaya (Operasi) SPRM, Datuk Seri Azam Baki ketika dihubungi mengesahkan tangkapan tersebut dan berkata, pasukan penyiasat telah pergi ke beberapa lokasi termasuk syarikat kontraktor untuk mengambil dokumen-dokumen berkenaan untuk membantu siasatan.

"Kita akan meneliti kesemua dokumen yang dirampas untuk mengenal pasti sama ada wujudnya elemen rasuah dan salah guna kuasa. Kesemua suspek dijangka direman di Mahkamah Majistret Putrajaya esok bagi membantu siasatan di bawah Seksyen 17(a) Akta SPRM 2009," katanya.

07 Februari 2018

4. Bantu SPRM siasat kes rasuah RM40,000



DUA pegawai polis berpangkat inspektor yang menghadapi siasatan SPRM berhubung kes rasuah berjumlah RM40,000 mendapat perintah tahanan reman tiga hari oleh Mahkamah Majistret Putrajaya, semalam.

PUTRAJAYA 6 Feb. - Mahkamah Majistret di sini memerintahkan dua pegawai polis berpangkat inspektor direman tiga hari mulai hari ini bagi membantu siasatan kes rasuah melibatkan wang berjumlah RM40,000.

Majistret Siti Nabilah Abd. Rashid membenarkan permohonan Suruhanjaya Pencegahan Rasuah Malaysia (SPRM) agar kedua-dua lelaki itu direman sehingga lusa.

Mereka yang bertugas di Jabatan Siasatan Jenayah Komersial (JSJK) Bukit Aman direman mengikut Seksyen 117 Kanun Prosedur Jenayah manakala siasatan dilakukan mengikut Seksyen 17(A) Akta SPRM 2009.

Kedua-duanya yang berusia 31 tahun dan 33 tahun ditahan pada kira-kira pada pukul 6.20 petang semalam di kawasan tempat letak kereta Center Point di Petaling Jaya.

Pihak SPRM turut merampas wang tunai berjumlah RM15,000 selepas menahan kedua-duanya.

Kedua-dua pegawai berkenaan disyaki meminta wang berjumlah RM40,000 daripada seorang lelaki bagi menyelesaikan kes pelaburan yang sedang disiasat polis.

Siasatan awal mendapati, lelaki berkenaan membuat laporan kepada SPRM selepas dimaklumkan bahawa polis akan menangkapnya jika dia gagal menyediakan RM40,000.

5. Tujuh direman lima hari

Bantu siasatan kes rasuah bagi kerja-kerja penyelenggaraan landskap



TUJUH individu termasuk dua pegawai kanan UEM Sunrise Berhad (UEM Sunrise) mendapat perintah tahanan direman lima hari oleh Mahkamah Majistret Putrajaya bagi membantu siasatan SPRM berhubung kes rasuah melibatkan bayaran penuh daripada tuntutan bulanan untuk kerja-kerja penyelenggaraan landskap, semalam.

KUALA LUMPUR 6 Feb. - UEM Sunrise Berhad (UEM Sunrise) mengamalkan toleransi sifar terhadap kegiatan rasuah dan akan memberikan kerjasama sepenuhnya kepada Suruhanjaya Pencegahan Rasuah Malaysia (SPRM) yang menahan tiga pekerja syarikat milik kerajaan (GLC) itu semalam.

Menurut kenyataannya, syarikat mengetahui berkenaan penahanan dua pegawainya iaitu Timbalan Pengurus Besar dan Pengarah Projek Selatan 1 serta pembantu peribadi kepada Timbalan Pengurus Besar terbabit.

"Sebagai sebuah syarikat yang mengamalkan toleransi sifar terhadap rasuah, kami telah memberikan dan akan terus memberikan kerjasama penuh kepada SPRM dalam siasatan," katanya dalam kenyataan di sini hari ini.

Sementara itu, Mahkamah Majistret Putrajaya membenarkan permohonan SPRM untuk menahan reman tiga pekerja syarikat GLC itu bersama empat individu lain selama lima hari bagi membantu siasatan kes rasuah melibatkan bayaran penuh daripada tuntutan bulanan bagi kerja-kerja penyelenggaraan landskap UEM Sunrise antara tahun 2013 dan 2017.

Perintah reman mulai hari ini sehingga 10 Februari ini dikeluarkan oleh Majistret Siti Nabilah Abd. Rashid mengikut Seksyen 117 Kanun Prosedur Jenayah.

Timbalan Pengurus Besar syarikat UEM Sunrise berusia 44 tahun, Pengarah Projek Selatan 1 berusia 55 tahun dan pembantu peribadi Timbalan Pengurus Besar itu yang merupakan seorang wanita berumur 34 tahun, masing-masing ditahan antara pukul 3 petang dan 4 petang di SPRM Johor semalam.

Empat individu lain yang kesemuanya lelaki masing-masing ditahan antara pukul 10 pagi hingga 12 tengah hari semalam di Ibu pejabat SPRM di Shah Alam, Klang dan Melaka.

Kesemua mereka direman bagi membantu siasatan kes mengikut Seksyen 17(a) Akta SPRM 2009.

Siasatan awal SPRM mendapati, Timbalan Pengurus Besar dan Pengarah Projek Selatan 1 tersebut secara langsung terlibat memastikan kontrak landskap bawah seliaan mereka dianugerahkan kepada lapan buah syarikat melalui tiga peringkat iaitu E-Bidding, One Off Contract dan Maintenance yang berjumlah kira-kira RM44 juta.

Difahamkan, Timbalan Pengurus Besar tersebut akan mengarahkan Eksekutif UEM Sunrise untuk memberi markah sebanyak 80 peratus kepada syarikat kontraktor yang bertanggungjawab atas kerja-kerja penyelenggaraan landskap supaya mereka menerima bayaran penuh daripada tuntutan bulanan yang dikemukakan.

Maklumat awal yang diperoleh oleh pasukan penyiasat mendapati wujud bayaran mencurigakan berjumlah melebihi RM2.4 juta telah dimasukkan ke akaun bank milik timbalan pengurus syarikat dan isterinya daripada lapan buah syarikat kontraktor berkenaan melalui empat orang proksi yang turut ditahan pada hari yang sama.

Pasukan penyiasat juga telah menyita 15 akaun milik Timbalan Pengurus Besar tersebut dan syarikat kontraktor bagi membantu siasatan.

08 Februari 2018

6. Lapan kakitangan QEH buat tuntutan palsu didenda

RAM Singh berbincang dengan tertuduh yang didakwa mengemukakan tuntutan kerja lebih masa palsu di Mahkamah Sesyen di sini hari ini

KOTA KINABALU 8 Feb. - Lapan Penolong Pegawai Perubatan Hospital Queen Elizabeth (QEH) yang didakwa membuat tuntutan kerja lebih masa palsu antara Februari hingga Jun 2016 dijatuhkan hukuman denda atau penjara di Mahkamah Sesyen di sini hari ini.

Tujuh tertuduh iaitu Mohd. Rosidih Mohd. Said didenda RM15,000, Terence Linchos didenda RM17,000, Jadiun Untop (RM18,000), Zulkifli Arun (RM14,000), Juraineh Musalim (RM7,000), Noor Salim Mohd. Zin (RM12,000) dan Mohd. Akmal Hafiz Mohamad Ariff sebanyak RM12,000 yang perlu dijelaskan jika tidak masing-masing bakal menjalani hukuman penjara tiga bulan.

Seorang lagi tertuduh iaitu Naza Fadirul@Mick Ab. Satar didenda RM20,000 atau empat bulan penjara jika gagal membayarnya.

Hakim Abu Bakar Manat menetapkan hukuman tersebut selepas kelapan-lapan tertuduh mengaku bersalah ke atas pertuduhan yang dibuat di bawah Seksyen 471 Kanun Keseksaan.

Dalam prosiding itu, pendakwan dikendalikan Timbalan Pendakwa Raya, Rozanna Abd. Hadi dan Rustam Sanip daripada Suruhanjaya Pencegahan Rasuah Malaysia (SPRM) manakala tertuduh diwakili peguam Hairul Vyron serta Ram Singh.

09 Februari 2018

7. Dua lagi anggota polis ditahan SPRM



DUA anggota polis (depan kiri dan kanan belakang) yang ditahan SPRM disyaki menerima suapan di Batu Pahat, Johor, semalam.

JOHOR BAHRU 8 Feb. - Selepas menahan seorang anggota polis berpangkat Lans Koperal kerana disyaki menerima rasuah secara bulanan kelmarin, Suruhanjaya Pencegahan Rasuah Malaysia (SPRM) turut menangkap dua lagi rakannya, semalam.

Menurut sumber, kedua-dua anggota yang turut bertugas di Balai Polis Pagoh berpangkat Koperal dan Lans Koperal berusia 50 dan 28 tahun itu ditahan di Pejabat SPRM Cawangan Batu Pahat kira-kira pukul 4 petang semalam bagi membantu siasatan.

"Kedua-dua anggota polis berkenaan disyaki telah menerima sebahagian daripada wang rasuah bulanan RM700 bagi November dan Disember 2017 dan Januari tahun ini yang diterima oleh suspek pertama.

"Hasil siasatan dijalankan mendapati kedua-dua suspek turut menerima wang rasuah tersebut untuk tujuan sama, iaitu sebagai dorongan supaya tidak mengambil tindakan ke atas majikan pengadu yang mengambil pekerja asing tanpa permit bekerja di tapak pembinaan sekitar Pekan Pagoh," katanya di sini.

Kes disiasat di bawah Seksyen 17 (a) Akta SPRM 2009 yang memperuntukkan hukuman denda lima kali nilai suapan atau RM10,000 atau mana-mana yang lebih tinggi dan penjarा tidak melebihi 20 tahun, jika sabit kesalahan.

Terdahulu, suspek pertama yang ditangkap kelmarin ditahan reman selama empat hari hingga Sabtu ini kerana disyaki telah menerima wang rasuah RM700 secara bulanan daripada seorang staf kontraktor sejak November lepas hingga bulan lalu.

Wang sogokan itu dipercayai sebagai dorongan tidak mengambil tindakan atas kesalahan mengambil pekerja buruh asing tanpa permit bagi melaksanakan kerja-kerja pembinaan sekitar Pekan Pagoh.

Pengarah SPRM negeri, Datuk Azmi Alias ketika dihubungi mengesahkan tangkapan tersebut, namun enggan mengulas lanjut.

8. MDEC tidak berkompromi salah laku tadbir urus Ekonomi Digital**YASMIN MAHMOOD**

KUALA LUMPUR 11 Feb. - Perbadanan Ekonomi Digital Malaysia (MDEC) menegaskan sama sekali tidak akan berkompromi mengenai sebarang salah laku tadbir urus termasuk isu rasuah dalam usaha merealisasikan misi Ekonomi Digital Malaysia.

Ketua Pegawai Eksekutifnya, Datuk Yasmin Mahmood berkata, sehubungan itu, MDEC melaksanakan beberapa langkah yang berkesan di bawah Jawatankuasa Lembaga Audit termasuk melibatkan konsultan pihak ketiga yang boleh dipercayai untuk menjalankan Business Process Reengineering dan forensik audit secara berterusan bagi membuat pengesahan terhadap isu-isu berkaitan.

Dalam masa sama ujarnya, proses kelulusan juga dibentuk semula dengan menjadikannya sebagai sistem kelulusan berdasarkan jawatankuasa dan semua perubahan itu berkuat kuasa sejak pertengahan 2017.

"Perubahan yang kami laksanakan ini bermula apabila melalui proses audit yang dijalankan pada 2016 didapati wujudnya isu-isu berkaitan Proses Kelulusan dan Tadbir Urus Pengetahuan Pekerja Asing (FKW), yang bertentangan dengan asas MDEC yang teguh.

"Jadi sejak itu, kami terus mencari masa yang betul dan melakukan penambahbaikan bagi menjaga kepentingan ketelusan. Malah, isu-isu yang ditemui ketika melaksanakan audit tersebut juga telah dimaklumkan dan dilaporkan kepada pihak berkaitan.

"Ini pastinya bukan satu tugas yang mudah kerana memerlukan komitmen, kesabaran dan paling penting ialah keberanian terutama berdepan dengan banyak halangan dan juga orang yang menentang

perubahan positif ini untuk proses yang lebih adil dan telus," katanya kepada Utusan Malaysia di sini hari ini.

Menurut beliau, sebagai satu daripada agensi penting kepada negara, MDEC turut mengambil inisiatif Ikrar Bebas Rasuah (IBR) dengan Suruhanjaya Pencegahan Rasuah Malaysia (SPRM) yang menyaksikan Pengurusan Kanan MDEC adalah kumpulan pertama yang tampil secara sukarela untuk melalui audit dan pemeriksaan tersebut.

Katanya, beliau sangat gembira dengan nilai-nilai teras dan integriti yang ditunjukkan itu bukan sekadar kenyataan korporat tetapi pasukan tersebut menunjukkan contoh yang baik walaupun proses itu kemungkinan menyusahkan dan membosankan.

"Dengan ikrar tersebut, ini bermakna SPM mempunyai akses secara langsung kepada kami, semua kakitangan dan tidak terkecuali, termasuk saya sendiri. Sebenarnya saya amat mengagumi dan menghormati pendirian Pengerusi MDEC, Tan Sri Sidek Hassan terhadap Toleransi Sifar atau ZeTo dalam usaha menentang rasuah.

"Ini secara tidak langsung meletakkan MDEC sebagai syarikat yang juga harus mengamalkan dan menerapkan ZeTo dalam apa jua bentuk rasuah," katanya.

Katanya, bukti menunjukkan apabila ekonomi digital menyumbang 18.2 peratus kepada Keluaran Dalam Negara Kasar (KDNK) Malaysia dan ia dijangka meningkat pada tahun-tahun akan datang.

"Bagaimanapun, transformasi budaya korporat akan menjadi lebih mencabar. Ada satu ketika, saya dan pasukan MDEC perlu membuat satu keputusan yang sukar bagi memastikan nilai teras dan integriti diteruskan dan kekal dalam apa jua yang kami lakukan.

"Kami cuma mahu melakukan proses transformasi dan menjadi lebih telus...seterusnya dilihat akan lebih telus pada masa-masa akan datang," katanya.

Di samping itu, kata beliau, MDEC juga membangunkan Kod Etika dan Menjalankan Perniagaan sebagai satu daripada komitmen membantu negara mengembangkan potensi ekonomi digital dapat dicapai sepenuhnya.

13 Februari 2018

9. Pesara tentera dituduh kemukakan invois butiran palsu

KUALA LUMPUR 12 Feb. - Seorang pesara bekas tentera darat mengaku tidak bersalah di Mahkamah Sesyen di sini hari ini atas tuduhan mengemukakan invois yang mengandungi butiran palsu berkaitan tuntutan kerja-kerja pembaikan empat unit senjata berjumlah RM36,440 kira-kira 10 tahun lalu.

**MAHDZIR ABDUL HAMID**

Mahdzir Abdul Hamid, 58, didakwa memberi invois berserta set dokumen sokongan iaitu borang BAT M23 dan borang BAT M31 yang mengandungi butiran palsu berkaitan tuntutan kerja-kerja pembaikan bagi empat unit senjata General Purpose Machine Gun (GPMG) 7.62mm kepada Mejar Majmi Mehat.

Dokumen tersebut didakwa milik pasukan 6 Worksyop 6 Briged berjumlah RM36,440 diberikan kepada penama itu sedangkan kerja-kerja pembaikan, tidak dibuat.

Perbuatan itu didakwa dilakukan di Kementerian Pertahanan di sini pada 27 Mac 2008. Tertuduh didakwa mengikut Seksyen 11(c) Akta Pencegahan Rasuah 1997 dan dihukum mengikut Seksyen 16 akta sama.

Seksyen itu memperuntukkan hukuman penjara maksimum 20 tahun dan denda tidak kurang lima kali ganda nilai suapan atau RM10,000, mengikut mana lebih tinggi.

Timbalan Pendakwa Raya dari Suruhanjaya Pencegahan Rasuah Malaysia (SPRM), Nur Nabila Kamarudin mencadangkan jaminan RM40,000 dengan seorang penjamin namun Mahdzir yang tidak diwakili peguam pula merayu jaminan dikurangkan kerana dia menghidap kencing manis dan darah tinggi yang memerlukan rawatan berkala di sebuah hospital tentera.

"Saya memohon jaminan dikurangkan, tak cukup duit, 25 Februari ini saya bercadang akan pergi menunaikan ibadah umrah dan memerlukan wang untuk perbelanjaan lain," katanya.

Hakim Mahyon Talib membenarkan tertuduh diikat jamin RM25,000 dengan seorang penjamin dan menetapkan 21 Februari ini untuk sebutan semula kes.

10. Penjawat awam didakwa terima suapan

SHAIFUL AZMAN TAHA (tengah) diiring pegawai Suruhanjaya Pencegahan Rasuah Malaysia (SPRM) dibawa ke Mahkamah Sesyen Kuantan atas tuduhan menerima suapan berjumlah RM42,000 pada 2013.

KUANTAN 14 Feb. - Seorang penjawat awam didakwa di Mahkamah Sesyen di sini hari ini atas pertuduhan menerima suapan berjumlah RM42,000 pada 2013.

Bagaimanapun, tertuduh, Shaiful Azman Taha, 39, yang merupakan Pengarah Pusat Khidmat Kontraktor Kementerian Kerja Raya Pahang mengaku tidak bersalah selepas pertuduhan dibacakan di hadapan Hakim Dazuki Ali.

Mengikut kertas pertuduhan, dia didakwa melakukan kesalahan itu antara pukul 3 hingga 4 petang di sebuah rumah yang beralamat di nombor 91, Jalan Pelindung Maju, Taman Pelindung Maju, di sini.

Tertuduh didakwa menerima suapan daripada Juruteknik Syarikat NZH Murni Enterprise, Hamdan Mat Hasan sebagai dorongan bagi mengeluarkan Sijil Kontraktor Kerja Taraf Bumiputera (STB) kepada syarikat berkenaan.


Shaiful Azman didakwa di bawah Seksyen 17(a) Akta Suruhanjaya Pencegahan Rasuah Malaysia (ASPRM 2009) (Akta 694) dan boleh di hukum di bawah Seksyen 24 Akta yang sama.

Jika disabitkan bersalah, boleh dikenakan hukuman penjara tidak melebihi 20 tahun dan denda tidak kurang dari lima kali ganda jumlah atau nilai suapan atau RM10,000 mengikut mana-mana yang lebih tinggi.

Pendakwaan dilakukan Timbalan Pendakwa Raya Suruhanjaya Pencegahan Rasuah Malaysia (SPRM), Mohamad Fadhly Mohd. Zamri dan tertuduh diwakili peguam, Mohd. Fauzi Razali.

Hakim menetapkan 28 Februari ini sebagai sebutan semula kes berkenaan

15 Februari 2018

11. SPRM ambil keterangan Ramasamy**P. RAMASAMY**

PULAU PINANG 14 Feb. - Timbalan Ketua Menteri II, Dr. P. Ramasamy hari ini memberi keterangan hampir lapan jam di pejabat Suruhanjaya Pencegahan Rasuah Malaysia (SPRM) di sini dipercayai bagi membantu siasatan kes terowong dasar laut.

Ramasamy yang juga Pengerusi Jawatankuasa Perancangan Ekonomi, Pendidikan dan Sumber Manusia Sains, Teknologi dan Inovasi negeri itu tiba di Ibu pejabat SPRM di Jalan Sultan Ahmad Shah di sini, kira-kira pukul 8.45 pagi ini.

Beliau yang ditemani peguamnya, Datuk Arjit Singh Jessy kemudian dilihat meninggalkan Ibu pejabat SPRM tersebut kira-kira pukul 4.30 petang.

Terdahulu, bercakap kepada pemberita di luar bangunan SPRM itu, Ramasamy berkata, beliau diarahkan hadir oleh SPRM untuk memberi keterangan berhubung projek berkenaan.

"Selain itu saya tidak tahu (tujuan dipanggil) walaupun saya tidak terlibat secara langsung dalam projek terowong ini sebab bukan di bawah portfolio saya."

"Saya dipanggil mungkin atas kapasiti sebagai Exco kerajaan negeri atau mungkin tulisan-tulisan saya tentang isu terowong ini," katanya.

Ramasamy merupakan Exco Kerajaan DAP Pulau Pinang kedua yang dipanggil SPRM selepas Pengerusi Jawatankuasa Kerja Raya, Kemudahan Awam dan Pengangkutan negeri, Lim Hock Seng turut dipanggil memberi keterangan hampir 12 jam semalam.

Sementara itu, Ketua Menteri, Lim Guan Eng dalam sidang akhbaranya mempersoalkan tindakan SPRM memanggil Ramasamy yang disifatkan tiada kaitan dengan projek terowong tersebut.

"Kita faham jika Hock Seng dipanggil SPRM semalam kerana projek itu di bawah portfolio beliau, tetapi apa kaitannya Ramasamy dengan projek ini," katanya.

Dalam masa sama, beliau yakin Exco Kerajaan DAP Pulau Pinang lain juga akan dipanggil SPRM selepas ini meskipun tidak terlibat dengan projek terowong tersebut sama seperti yang berlaku kepada Ramasamy.

Tambahnya, beliau juga sudah bersedia untuk memberi keterangan namun sehingga kini belum dipanggil SPRM untuk berbuat demikian.

12. Siasat isu tanah Ijok**ABDUL KHALID IBRAHIM**

SHAH ALAM 15 Feb. - Bekas Menteri Besar Selangor, Tan Sri Abdul Khalid Ibrahim mempersoalkan tindakan kerajaan negeri pimpinan Datuk Seri Mohamed Azmin Ali dalam menyelesaikan isu skandal tanah di mukim Ijok.

Malah, Abdul Khalid mahu pihak berkuasa menyiasat tindakan Kerajaan PKR Selangor dalam menyelesaikan isu terbabit yang disifatkan bukan amalan yang baik dan tidak mencerminkan tatacara perniagaan sebenar dalam mengendalikan aset-aset rakyat.

Menurutnya, wujud pelbagai persoalan dalam proses penyelesaian skandal berkenaan antaranya beliau dan peguam caranya tidak pernah diajak hadir mengikuti sesi perbincangan walaupun mereka merupakan antara pihak dalam kes berkenaan.

"Semasa saya menjadi Menteri Besar Selangor, tanah itu telah dirampas oleh kerajaan negeri dan dibawa ke mahkamah sehingga ke peringkat Mahkamah Persekutuan oleh pemaju.

"Ketika kes berjalan pula, terdapat percubaan oleh pihak-pihak tertentu untuk membuat tawaran kepada saya sebagai Menteri Besar untuk menyelesaikan perkara ini.

"Namun, saya tekad untuk membela keputusan yang bertujuan memulihkan projek terbengkalai itu kerana telah menyusahkan ribuan keluarga peneroka dan pembeli rumah walaupun terdapat pihak berkepentingan seperti ejen-ejen tanah serta institusi kewangan yang tidak mahu projek ini dipulihkan," katanya dalam kenyataan di sini hari ini.

Dalam pada itu, Abdul Khalid berkata, Kerajaan PKR Selangor seharusnya tidak bersetuju dengan penyelesaian tersebut yang jelas telah memberi kesan negatif.

"Pada masa ini penyelesaian dibuat mewujudkan persepsi yang mencurigakan sekali gus mencemarkan nama baik dan reputasi kerajaan negeri.

"Oleh demikian, saya berharap pihak berkuasa akan menyiasat dengan lebih mendalam perkara ini terutamanya individu yang terlibat dalam penyelesaian tersebut agar kebenaran dapat didedahkan," ujarnya.

Semalam, Pengarah Komunikasi Strategik Barisan Nasional (BN), Datuk Seri Abdul Rahman Dahlan menuntut Mohamed Azmin memberi penjelasan mengenai tindakan tergesa-gesa Ahli Parlimen Gombak itu membenarkan dua syarikat swasta menjual tanah di mukim Ijok bernilai RM1.181 bilion kepada sebuah syarikat lain sebelum proses peringkat Mahkamah Persekutuan selesai dijalankan.

November lalu, dua pertubuhan bukan kerajaan iaitu Generation2u United Club dan Persatuan Pemuda Kampung Lindungan 565 membuat laporan kepada Suruhanjaya Pencegahan Rasuah Malaysia (SPRM) bagi meminta siasatan dijalankan jika terdapat unsur rasuah dalam isu tanah di mukim Ijok yang diberikan oleh kerajaan negeri Selangor kepada dua syarikat.

Tanah seluas 880 hektar itu dibeli oleh dua syarikat, LBCN Development Sdn. Bhd. dan Mujur Zaman Sdn. Bhd. pada 1998 namun telah dirampas kerajaan negeri pada 2008 mengikut Kanun Tanah Negara berikutan pelanggaran syarat dan terma perjanjian.

17 Februari 2018

13. Segera siasat skandal tanah Ijok - Irmohizam

KUALA LUMPUR 16 Feb. - Suruhanjaya Pencegahan Rasuah Malaysia (SPRM) diminta bertindak segera menjalankan siasatan menyeluruh isu skandal tanah di Ijok, Kuala Selangor.

**IRMOHIZAM IBRAHIM**

Ahli Parlimen Kuala Selangor, Datuk Seri Dr. Irmohizam Ibrahim berkata, jika perlu, SPRM sewajarnya membekukan aset berkenaan bagi mengekang perkara yang boleh menjasaskan siasatan daripada berlaku.

"Saya menyokong tindakan beberapa pertubuhan bukan kerajaan (NGO) yang curiga dan melaporkan kepada SPRM mengenai skandal ini serta siasatan secara menyeluruh oleh SPRM adalah penting untuk disegerakan.

"Kita khuatir nasib rakyat Selangor yang tidak mendapat manfaat daripada tanah tersebut sekiranya dimanipulasikan pula oleh pihak tertentu," katanya dalam satu kenyataan di sini hari ini.

November lalu, dua NGO iaitu Generation2u United Club dan Persatuan Pemuda Kampung Lindungan 565 membuat laporan kepada SPRM bagi meminta siasatan dijalankan jika terdapat unsur rasuah dalam isu tanah di mukim Ijok yang diberikan oleh kerajaan PKR Selangor kepada dua syarikat.

Tanah seluas 880 hektar itu dibeli oleh dua syarikat, LBCN Development Sdn. Bhd. dan Mujur Zaman Sdn. Bhd. pada 1998 namun telah dirampas kerajaan negeri pada 2008 mengikut Kanun Tanah Negara berikutan pelanggaran syarat dan terma perjanjian.

Menurut Irmohizam, kenyataan bekas Menteri Besar Selangor, Tan Sri Khalid Ibrahim mengenai isu tanah itu juga wajar diambil serius memandangkan beliau amat mengetahui intipati dan kronologi perkara tersebut.

"Kenyataan Menteri Besar, Datuk Seri Mohamed Azmin Ali berhubung isu penyerahan tanah bernilai RM1.18 bilion di Ijok tidak cukup jelas membuktikannya sebagai satu penyelesaian.

"Rakyat bertambah sangsi apabila kerajaan negeri Selangor menyerahkan semula tanah yang dirampas daripada dua syarikat (Mujur Zaman dan LCBN) dan menjualkannya kepada syarikat awam sedangkan keputusan Mahkamah Tinggi dan Mahkamah Rayuan memihak kepada kerajaan negeri Selangor," katanya.

Tambahnya, Menteri Besar Selangor juga seharusnya lebih sensitif terhadap pengurusan aset yang melibatkan kepentingan rakyat.

"Isu seperti ini tidak langsung mencerminkan kerajaan negeri peduli terhadap nasib rakyat terutama peneroka tanah serta peladang dan petani tempatan di Ijok," katanya.

17 Februari 2018

14. Rampas balak haram dan jentera bernilai RM1.3 juta

Sebahagian daripada kayu balak yang dirampas ketika Ops Libas, baru-baru ini. - GAMBAR IHSAN PDRM

SIBU 17 Feb. - Pasukan Polis Gerakan Am (PGA) Batalion 10 di sini berjaya melumpuhkan dua kegiatan pembalakan haram dengan nilai rampasan RM1.3 juta dalam Op Libas Saratok dan Betong pada Isnin dan Selasa lalu.

Pegawai Pemerintahnya, Superintenden Sanudin Md. Isa berkata, operasi tersebut diketuai Pegawai Risik PGA Batalion 10, Inspektor Mohd. Hafizhazman Hassan bersama 10 pegawai dan anggota, sembilan pegawai Sarawak Forestry Cooperation (SFC) dan tiga pegawai Suruhanjaya Pencegahan Rasuah Malaysia (SPRM).

Katanya, serbuan pertama berjaya menahan pekerja lelaki berusia 52 tahun di kawasan Lubuk Kepayang, Ulu Awik, Saratok pada pukul 3.30 petang Isnin lalu.

"Pemeriksaan lanjut dijalankan menemukan 318 batang kayu balak pelbagai jenis dan saiz tanpa tanda tukul Jabatan Perhutanan , hak milik (PM) serta tag identiti pengeluaran balak (LPI) di samping empat jentera serta sebuah lori di sekitar kawasan kolam balak yang keseluruhannya bernilai RM500,000.

"Dalam Op Libas Betong pula, pasukan sama menahan seorang pekerja tempatan dan merampas 2,129 batang kayu balak pelbagai jenis dan saiz dipercayai diperolehi secara haram bersama enam buah jentera berat dengan nilai keseluruhan RM800,000 di Jalan Sungai Tisak, Tg. Assam pada pukul 3.30 petang Selasa lalu," katanya ketika dihubungi Utusan Online, di sini hari ini.

21 Februari 2018

15. Sogok pegawai JPJ: Pemilik bas dipenjara sehari, denda RM11,000

KUANTAN 21 Feb. - Seorang pemilik bas dijatuhi hukuman penjara sehari dan denda RM11,000 oleh Mahkamah Sesyen di sini hari ini atas kesalahan memberi suapan RM500 kepada pegawai Jabatan Pengangkutan Jalan (JPJ) Ahad lalu.

Hakim Dazuki Ali menjatuhkan hukuman itu selepas R. Muthusamy mengaku bersalah selepas pertuduhan dibacakan terhadapnya.

Mengikut kertas pertuduhan, Muthusamy didakwa memberi suapan kepada Ketua Pembantu Penguatkuasa JPJ, Shahrul Shahrizal Mt. Jawahir sebagai dorongan untuk melepaskan bas miliknya yang dipandu oleh pekerjanya yang tidak mempunyai lesen merandu.

Tertuduh didakwa melakukan kesalahan itu di Stesen Penguatkuasaan JPJ, Karak dekat sini pada pukul 2.45 petang, 18 Februari lalu.

Dia didakwa mengikut Seksyen 17(6) Akta Suruhanjaya Pencegahan Rasuah Malaysia (SPRM) 2009 dan boleh dihukum mengikut Seksyen 24 akta yang sama.

Seksyen itu memperuntukkan hukuman penjara tidak lebih 20 tahun dan denda tidak kurang lima kali ganda nilai suapan atau RM10,000, mengikut mana-mana yang lebih tinggi.

Pendakwaan dikendalikan Timbalan Pendakwa Raya SPM, Mohamad Fadhly Mohd. Zamri manakala tertuduh tidak diwakili peguam.

21 Februari 2018

16. Pembantu pegawai teknik TM didakwa palsu dokumen RM4.7 juta

KUALA LUMPUR 21 Feb. - Seorang bekas pembantu pegawai teknik di Telekom Malaysia Berhad (TM) dihadapkan di Mahkamah Sesyen di sini hari ini atas 54 pertuduhan memalsukan dokumen Maintenance Order (MO) berjumlah RM4.7 juta, tahun lalu.

Mohd. Faizal Abdul Halim, 36, yang kini bekerja sebagai peniaga mengaku tidak bersalah selepas pertuduhan dibacakan di hadapan Hakim Azura Alwi.

Mengikut pertuduhan pertama hingga 54, dia didakwa memperdayakan prinsipalnya mengenai kepentingan dokumen yang mengandungi butir-butir palsu iaitu sebenarnya tidak ada kerja-kerja kerosakan (breakdown) berlaku di kawasan MO tersebut bagi mengelirukan prinsipalnya.

Mohd. Faizal didakwa melakukan perbuatan itu melalui prinsipalnya, Penolong Pengurus TM, Mohd. Taufik Ali dan tiga individu lain Mohd. Salleh Isthnin, Mohd. Huzaimi Hassan dan Ruzanna Redhuan.

Mohd. Faizal didakwa melakukan perbuatan itu di Telekom Malaysia Logistik, Cheras di sini antara Januari 2016 hingga Mac 2017.

Dia didakwa mengikut Seksyen 18 Akta Suruhanjaya Pencegahan Rasuah Malaysia (SPRM) 2009 dan boleh dihukum mengikut Seksyen 24 akta sama yang memperuntukkan hukuman penjara maksimum 20 tahun dan denda lima kali ganda nilai suapan atau RM10,000 mana yang lebih tinggi, jika sabit kesalahan.

Pendakwaan dikendalikan Timbalan Pendakwa Raya daripada S. Thangavelu manakala tertuduh diwakili peguam K. F. Wong.

Mahkamah membenarkan tertuduh diikat jamin RM300,000 bagi semua pertuduhan dengan dua penjamin daripada ahli keluarganya berserta syarat tambahan iaitu pasportnya perlu diserahkan kepada mahkamah dan perlu melapor diri di SPM setiap bulan.

Sebutan semula kes ditetapkan pada 14 Mac ini untuk serahan dokumen.

21 Februari 2018

17. Pengurus anak syarikat kerajaan negeri Terengganu ditahan SPRM

KUALA LUMPUR 21 Feb. - Suruhanjaya Pencegah Rasuah Malaysia (SPRM) menahan seorang pengurus pembangunan perniagaan sebuah anak syarikat kerajaan Terengganu kerana disyaki terlibat dalam rasuah bernilai kira-kira RM5.4 juta.

Sumber berkata, individu berusia 59 tahun itu ditahan bersama enam lagi ahli keluarga dan proksi dalam satu operasi khas yang dijalankan serentak di beberapa lokasi di Terengganu dan ibu negara bermula kira-kira pukul 9 pagi tadi.

Suspek berusia 59 tahun itu disyaki telah menyalahgunakan kuasa dengan melantik beberapa syarikat yang mempunyai kepentingan kepada diri dan keluarganya antara tahun 2010 hingga 2017.

"Syarikat-syarikat itu adalah milik isteri, anak, menantu dan proksi suspek yang dilantik bagi memberi perkhidmatan dan bekalan yang berkaitan dengan program serta kursus bernilai kira-kira RM5.4 juta," katanya.

Sementara itu, Pengarah Kanan Jabatan Siasatan SPRM, Datuk Simi Abd. Ghani mengesahkan penahanan tersebut dan bukti sedang dikumpulkan bagi tujuan siasatan.

"Kesemua suspek yang ditangkap dijangka dihadapkan ke mahkamah bagi permohonan reman esok," jelasnya.

Tambah Simi, kes tersebut disiasat mengikut Seksyen 18 dan Seksyen 23 Akta Suruhanjaya Pencegahan Rasuah Malaysia (ASPRM) 2009.

25 Februari 2018

18. Dakwaan punca CPI merosot tidak munasabah


KUALA LUMPUR 24 Feb. - Presiden Transparency International Malaysia, Datuk Akhbar Satar perlu membuktikan dakwaan kemerosotan Indeks Persepsi Rasuah (CPI) negara disebabkan isu 1Malaysia Development Bhd. (1MDB), Felda serta penahanan Ahli Parlimen Pandan, Rafizi Ramli.



TUNKU ABDUL AZIZ

Sambil menyifatkan dakwaan itu sebagai tidak munasabah, Pengurus Lembaga Penasihat Pencegahan Rasuah, **Tunku Abdul Aziz Tunku Ibrahim** berkata, beliau tidak boleh menerima alasan tersebut terutama apabila mengaitkan isu-isu itu sebagai punca kepada kemerosotan CPI negara.

"Itu pandangan dia (Akhbar). Boleh ke dia cakap dengan jelas dan membuktikan ketiga-tiga isu tersebut merupakan punca kepada kejatuhan CPI.



AKHBAR SATAR



JAIZ ABDUL KARIM

Tambahnya lagi, MCW mencadangkan sebuah jawatankuasa induk pencegahan rasuah peringkat ASEAN diwujudkan agar penilaian yang lebih tepat dapat dilakukan berdasarkan budaya dan situasi setempat dengan cara yang lebih efektif.

"Kajian mengenai indeks ini dibuat dalam jangka masa yang panjang dan pastinya sebelum Rafizi disabitkan atas kesalahan mendedahkan skandal Perbadanan Fidlot Kebangsaan (NFC), jadi bagaimana Akhbar boleh mengaitkannya sebagai punca kemerosotan CPI," katanya ketika dihubungi Mingguan Malaysia di sini hari ini.

Tunku Abdul Aziz mengulas kenyataan Akhbar mengenai beberapa faktor yang boleh dikaitkan sebagai punca kepada kemerosotan CPI sehingga meletakkan Malaysia di tujuh tangga lebih bawah berbanding tahun sebelum ini.

Tambah Tunku Abdul Aziz, Malaysia dan Suruhanjaya Pencegahan Rasuah Malaysia (SPRM) sepatutnya dipuji kerana tidak pernah melindungi sesuatu isu sebaliknya sering mendedahkannya.

Sementara itu, Presiden Pemerhati Rasuah Malaysia (MCW), **Jais Abdul Karim** berkata, Rafizi tidak dilindungi Akta Perlindungan Pemberi Maklumat 2010 kerana telah mendedahkan maklumat secara terbuka.

"Responden dipilih secara rawak antaranya ahli perniagaan, mungkin ada yang tidak berpuas hati dengan sesuatu perkara jadi mereka memberikan maklum balas yang kurang memberangsangkan.

"Kemungkinan terdapat responden yang gagal mendapatkan maklumat yang sahih mengenai sesbuah isu dan ini boleh menjadi antara sebab berlakunya kemerosotan dalam kedudukan CPI negara," katanya.

Tambahnya lagi, MCW mencadangkan sebuah jawatankuasa

27 Februari 2018

19. Isu terowong: SPRM dalam proses melantik konsultan

PENGARAH Bahagian Siasatan SPRM, Datuk Azam Baki mengesahkan tiada unsur rasuah dalam pendrive diterima 2 September lalu.

KEPALA BATAS 27 Feb. - Suruhanjaya Pencegahan Rasuah Malaysia (SPRM) dalam proses melantik beberapa pihak teknikal atau konsultan bagi menilai kajian kebolehlaksanaan projek terowong dasar laut di negeri ini.

Timbalan Ketua Pesuruhjaya Operasinya, Datuk Seri Azam Baki berkata, pihaknya bagaimanapun tidak dapat mendedahkan secara terperinci mengenai butiran tersebut ketika ini.

"Kes-kes seumpama ini melibatkan hal-hal teknikal dan berdasarkan pengalaman kami, ia (siasatan) mungkin akan mengambil masa lagi," katanya kepada pemberita di sini hari ini.

Tambah Azam, sehingga kini, seramai 127 saksi telah dipanggil dan beliau percaya ramai lagi saksi akan dipanggil selepas ini bagi melengkapkan siasatan berhubung isu projek terowong dasar laut yang dirancang Kerajaan DAP Pulau Pinang

27 Februari 2018

20. Suami dapat suapan, isteri kena penjara

Dipenjara lima hari, denda RM307,086 kerana dapatkan suapan untuk suami

KANGAR 27 Feb. - Mahkamah Sesyen di sini hari ini, menjatuhkan hukuman penjara lima hari dan denda sebanyak RM307,086 terhadap bekas kakitangan Pusat Pengurusan Penyelidikan dan Inovasi, Universiti Malaysia Perlis (Unimap) kerana menggunakan jawatannya bagi mendapatkan suapan untuk suaminya bernilai keseluruhannya RM61,417.20.

Norfadila Wahida Radzi, 36, mengaku bersalah terhadap lima pertuduhan di hadapan Hakim, Johari Hassan selepas semua pertuduhan dibacakan ke atasnya.

Pengarah SPRM negeri, Mohd. Shukor Mahmud dalam satu kenyataanya berkata, tertuduh didakwa mengambil tindakan memasukkan lima borang pesanan ke dalam sistem IUS Kewangan Unimap berkaitan pembekalan perkakasan dan komponen makmal oleh Syarikat Zerofreak Enterprises yang dimiliki suaminya, Mohd. Fadzril Safry Mohamed Soofi, antara April hingga Julai 2013.

Katanya, pendakwaan dilakukan di bawah Seksyen 23 Akta Suruhanjaya Pencegahan Rasuah Malaysia (SPRM) 2009 dan dijatuhkan hukuman di bawah Seksyen 24, akta yang sama.

"Mohd Fadzril pula dijatuhi hukuman dengan bon berkelakuan baik selama dua tahun dan cagaran sebanyak RM15,000 atas pertuduhan di bawah Seksyen 28(1)(c) ASPRM 2009 dan dibaca bersama dengan Seksyen 23 ASPRM.

"Tertuduh didakwa dengan lima pertuduhan kerana bersubahat dengan isterinya apabila wang suapan berjumlah RM61,417.20 berkenaan telah dimasukkan ke dalam akaun Syarikat Zerofreak Enterprises yang dimilikinya," katanya.

Tambah beliau, pendakwaan dikendalikan oleh Timbalan Pendakwa Raya, A. Hafizh Abu Bakar.

28 Februari 2018

21. Datuk Seri terima RM19j ditahan

Dakwa mampu tutup kes terowong dasar laut Pulau Pinang

KUALA LUMPUR 27 Feb. - Siasatan Suruhanjaya Pencegahan Rasuah Malaysia (SPRM) berhubung projek mega terowong dasar laut bernilai RM6.3 bilion di Pulau Pinang semakin hangat apabila seorang ahli perniagaan ditahan hari ini selepas dipercayai terlibat menerima wang bernilai RM19 juta bagi menutup siasatan kes tersebut.

Suspek berusia 37 tahun bergelar Datuk Seri yang dipercayai suami kepada seorang pemimpin pertubuhan bukan kerajaan (NGO) bergelar Datuk ditahan di Ibu Pejabat SPM Putrajaya pada pukul 3.48 petang ini.

Lelaki terbabit yang dikatakan berlakon dalam sebuah filem aksi tempatan yang dalam pembikinan merupakan suspek kelima ditahan bagi membantu siasatan kes yang mencetuskan kontroversi itu.

Menurut sumber, wang suapan itu dibayar kepada suspek secara berperingkat-peringkat dengan bayaran pertama dilakukan di rumah suspek pada Julai tahun lalu melibatkan wang berjumlah RM2 juta.

"Bayaran kedua sebanyak RM15 juta dilakukan kepada sebuah syarikat pada bulan yang sama dan pembayaran ketiga serta terakhir pada Ogos tahun lalu.

"Suspek berkemungkinan telah meyakinkan syarikat pembinaan utama itu bahawa dia mampu menutup dan menyelesaikan siasatan yang dijalankan SPM," katanya.

Sementara itu, Pengarah Kanan Jabatan Siasatan SPM, Datuk Simi Abd. Ghani mengesahkan penahanan tersebut dan berkata, pihaknya masih lagi mengumpulkan bukti untuk membantu siasatan kes berkenaan.

"Kita akan membawa suspek ke Mahkamah Putrajaya untuk permohonan reman esok," jelasnya.

Sebelum ini, projek itu mencetuskan pelbagai kontroversi antaranya berhubung kos kajian kebolehlaksanaan yang terlalu tinggi selain kaedah pembayaran melibatkan pertukaran tanah Kerajaan DAP Pulau Pinang.

Pelaksanaan terowong itu turut dibantah penduduk negeri yang bimbang dengan impak ekonomi, sosial dan alam sekitar.

SPRM setakat ini telah merakamkan percakapan 127 individu termasuk Pengurus Jawatankuasa Kerja Raya, Kemudahan Awam dan Pengangkutan negeri, Lim Hock Seng dan Timbalan Ketua Menteri II Pulau Pinang, Dr. P. Ramasamy.

28 Februari 2018

22. Projek mega terowong Pulau Pinang: Datuk Seri direman enam hari



AHLI perniagaan bergelar Datuk Seri yang dipercayai menerima wang berjumlah RM19 juta bagi menutup kes projek mega terowong dasar laut bernilai RM6.3 bilion di Pulau Pinang dibawa ke Mahkamah Majistret Putrajaya

PUTRAJAYA 28 Feb.- Seorang ahli perniagaan bergelar Datuk Seri direman enam hari untuk membantu siasatan kes menerima wang berjumlah RM19 juta dipercayai bagi menutup kes projek mega terowong dasar laut bernilai RM6.3 bilion di Pulau Pinang.

Perintah reman itu dikeluarkan Majistret Norhidayati Mohamad Nashroh selepas membenarkan permohonan Suruhanjaya Pencegahan Rasuah Malaysia (SPRM) untuk menahan reman suspek itu sehingga 5 Mac ini.

Terdahulu, suspek tiba ke mahkamah pada pukul 9.10 pagi dengan tangan bergari dan berpakaian lokap SPRM, kemudiannya dibawa masuk ke bilik prosiding.

Reman berusia 37 tahun itu ditahan di Ibu Pejabat SPRM Putrajaya pada pukul 3.48 petang semalam.

Menurut sumber, suspek yang merupakan suami kepada seorang pemimpin pertubuhan bukan kerajaan (NGO) dipercayai menerima wang daripada syarikat pembinaan utama projek selepas dikatakan mampu menyelesaikan siasatan dilakukan SPRM.

Dakwa sumber lagi, pihak syarikat berkenaan membayar wang berjumlah RM19 juta itu secara berperingkat antara Julai dan Ogos tahun lalu.

28 Februari 2018

23. Bekas pengurus pembangunan perniagaan bank didakwa



LAI CHIN SIANG dihadapkan ke mahkamah atas 10 pertuduhan membabitkan rasuah dan Akta Pengubahan Wang Haram, Pencegahan, Pembiayaan Keganasan dan Hasil daripada Aktiviti haram (AMLA) 2001 berjumlah RM 290,400.00 di Mahkamah Sesyen di sini hari ini.

JOHOR BAHRU 28 Feb. - Seorang bekas Pengurus Pembangunan Perniagaan sebuah bank cawangan Batu Pahat dihadapkan di Mahkamah Sesyen di sini hari ini atas satu pertuduhan membabitkan rasuah dan sembilan pertuduhan pengubahan wang haram, keseluruhannya berjumlah RM290,400 antara April hingga Mei 2015.

Tertuduh, Lai Chin Siang, 33, bagaimanapun mengaku tidak bersalah selepas semua pertuduhan dibacakan jurubahasa di hadapan Hakim Kamarudin Kamsun.

Pendakwaan dikendalikan oleh dua Timbalan Pendakwa Raya SPRM, Mohd. Faris Rahmat dan Mahadi Jumaat manakala tertuduh diwakili peguam T. Vijaya Sandran.

Mahkamah memerintahkan wang jaminan sebanyak RM40,000 dengan seorang penjamin dan pasport diserahkan kepada mahkamah selain melaporkan diri ke pejabat SPRM terdekat setiap bulan.

Kamaruddin menetapkan 22 Mac ini sebagai tarikh sebutan semula kes.

28 Februari 2018

24. Kes terowong P. Pinang: Ahli perniagaan direman 6 hari

Seorang ahli perniagaan dibawa keluar oleh pegawai Suruhanjaya Pencegahan Rasuah Malaysia (SPRM) dari Mahkamah Majistret Putrajaya hari ini, setelah direman selama enam hari kerana dipercayai menerima rasuah berjumlah RM19 juta bagi menutup kes siasatan projek mega terowong dasar laut yang bernilai RM6.3 bilion di Pulau Pinang. Perintah reman dikeluarkan Majistret Norhidayati Mohammad Nasroh selepas membenarkan permohonan SPM untuk menahan reman suspek berusia 37 tahun itu.

PUTRAJAYA 28 Feb. - Seorang ahli perniagaan direman enam hari kerana dipercayai menerima rasuah berjumlah RM19 juta bagi menutup kes projek mega terowong dasar laut bernilai RM6.3 bilion di Pulau Pinang.

Perintah reman dikeluarkan Majistret Norhidayati Mohammad Nasroh selepas membenarkan permohonan Suruhanjaya Pencegahan Rasuah Malaysia (SPRM) untuk menahan reman suspek itu sehingga 5 Mac ini.

Terdahulu, suspek tiba ke mahkamah pada pukul 9.10 pagi dengan tangan bergari dan berpakaian lokap SPM, kemudiannya dibawa masuk ke bilik prosiding.

Lelaki berusia 37 tahun itu ditahan di Ibu Pejabat SPM Putrajaya pada pukul 3.48 petang semalam.

Menurut sumber SPM, suspek yang merupakan suami kepada seorang pemimpin pertubuhan bukan kerajaan itu dipercayai menerima wang daripada syarikat pembinaan utama projek selepas dikatakan mampu menyelesaikan siasatan dilakukan SPM.

Dakwa sumber lagi, pihak syarikat berkenaan membayar wang berjumlah RM19 juta itu secara berperingkat antara Julai dan Ogos tahun lalu.

28 Februari 2018

25. SPRM beku akaun RM3.6 juta, sita kenderaan dan rumah RM3.8 juta**Antara kenderaan yang disita SPR**

KUALA LUMPUR 28 Feb.- Suruhanjaya Pencegahan Rasuah Malaysia (SPRM) hari ini membekukan empat akaun bank syarikat berjumlah RM3.6 juta dan menyita empat kenderaan mewah dianggarkan bernilai RM1.3 juta berhubung projek mega terowong dasar laut bernilai RM6.3 bilion di Pulau Pinang.

Menurut sumber, keempat-empat akaun bank serta kenderaan mewah itu adalah milik ahli perniagaan bergelar Datuk Seri yang ditahan semalam selepas dipercayai menerima wang suapan bernilai RM19 juta bagi menutup kes siasatan projek berkenaan.

"SPRM turut menyita sebuah rumah bernilai RM2.5 juta yang terletak di Petaling Jaya serta tiga buah televisyen bernilai RM167,900," katanya kepada utusan Malaysia di sini hari ini.

Sementara itu, Pengarah Kanan Jabatan Siasatan SPRM, Datuk Simi Abd Ghani ketika dihubungi mengesahkan penyitaan itu dan berkata, pasukan penyiasat masih dalam proses mengumpul bukti bagi membantu siasatan.